



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tir_yimym

tir yimym TAPAK 8

Trump-i Mexico, Canada & China nem tariff talila agütsütsü nangzük

Leicester City-i Manager Steve Cooper mapa nungi anentsüogo

VOL. XXII ISSUE NO. 48 (ADOK 48) DIMAPUR RASEMNÜ (WEDNESDAY) YIMPOKSÜI (NOVEMBER) 27, 20 ₹ 5.00

GI atema State-level workshop ka agi CM Rio-i Kisama Naga Heritage Village nung facility aika lapoktsü

Kohima, November 26, 2024 (TYO):

Entrepreneurs Associates (tEA)-i North Eastern Regional Agricultural Marketing Corporation (NERAMAC), aser State Horticulture Department den yaritepa state-level workshop ka agiogo.

Directorate of Horticulture Office nung "Geographical Indication (GI) awareness & user authorization for farmers" workshop agi.

Iba sentong nung Phek aser Kohima district tem nung aluyimer 80 tashi aden aser entrepreneurs o mongintemi shisatsü agütsü.

Aluyimertem dang parnoki tsünütetba atema GI tags meshitsü aser tree tomato o sweet cucumber nung temulung agütsütsü atema tayongzükba agütsü.

Iba workshop ya rural development aser economic growth nükjiding nung ayongzükba agi.

Mezüngbuba session nung Agriculture Additional Director Sanuzo Neinu-i 'Post Harvest Management and the Scope of Value Addition to Naga Tree Tomato and Sweet Cucumber'

indang onük jembi.

Neinu-i GI tag indang osang tejanga lemsatp aser aluyimertem dang pei joka nungi alima dang tsünütetba sayutsü ajungshi.

"Tesüiba nung teyokdokdak maliba agi asenoki pingana aser züngi peria metsünütet saka tangbo teyokdokdak lir anungji asenoki teimba tsünütetba" ta pai ashi.

Tetushi süa jaoker Horticulture State Director Meyashashi-ia GI indang tatsüka lemsatp aser iba ajanga aluyimertem nem tajangzük agütsüba ashi.

"Geographical Identification ya tesem ka mesüra yimtsüng ka nung tsünütetba nem agütsüba tag mesüra number ka lir" ta pai ashi.

Sentong nung Hirak Jyoti-i GI registration maparen indang lemsatp aser tesem balala indang GI products bener arua tatishitsü ama sayua liasü.

Tanabuba session nung tEA Project Co-ordinator Imtisenla Longkumer Mero-i 'Role of CBBO and FPCs in GI Promotion and Implementation' indang jembi.



Dimapur, November 26, 2024 (TYO):

Chief Minister Neiphiu Rio-i November 26, 2024 nü Kisama Naga Heritage Village nung tesem aika lapoktsüogo.

25 buba Hornbill festival amongtsü atema CM Rio-i International Morung, Hornbill festival app, cultural troupes Dormitory, Handloom & Craft Pavilion Marketing Complex, Medical Booth cum Cash Vending facility, Toyota Ki aser Tourism

Department lounge lapoktsü.

Kisama nung Hornbill Festival atema mapa inyaker temi anügang aser aonung methitemi inyaka aruba atema tenüngsang agütsür ta CM Rio-i ashi.

"Hornbill festival ya Naga nunger benjung ka dang masü saka international festival ka kümogo aser alima tesem balala nungi tourist atsür arur. Tangbo asenok den international partners lir aser benjung amongba dang

masü saka rongsenketzung ajungkettsü" ta pai ashi.

"Hornbill festival ya anogo 10 nü atema dang masü saka state yimtiba nung aliba kin balalai pei pei jila nung oa benjungmong nung medentetaka Kisama nung amongtsü ayongzük. Iba ajanga asenoki asen inyaksangshi, sobaliba wazüka yutettsü aser küm piyong tangar dang sayutettsü" ta CM Rio-isa ayongzük.

Chakhesang aser Sümi nunger küm 29 sendaktepa aruba benjungtep



Pfuterero, November 26, 2024 (TYO):

Chakhesang aser Sümi nunger nisung meyirjang aika Mongulbarnü Phek district kübok Pfuterero jila nung adenshia parnok küm 29 tashi tesentaktep lia aruba atema benjungtepogo.

Tanü Baptist Theological College ground nung iba atema sentong tulu ka ayongzükogo agiogo.

"Sümi aser Chakhesang nunger ya azü agi sendaktepa lir aser alemli Phek district kübok Chakhesang tesemtem nung külemi liasü. Iba sülen Sümi nunger tanü Zünheboto district ya ajadak oa ali" ta Chakhesang-Sümi Brotherhood Joint Literature Committee (JLC)-i adokba kaketnu ka nung shia lir.

Putu aika parnok azü agi sosema aliba indang tebang otsü jembi aru saka mapa kecha meinyakba ajanga tesentaktep tajung meyuteti aru. Ajisüaka tatalokba kar ajanga Chakhesang-Sümi brotherhood ya alitsüsa mapang agi bentsür aru ta JLC-i ashi.

"September 1995 nung Sümi Alakishi Akighini Mugo (Sümi Peace Prayer Group)-i Zünheboto nung anogo 7 nü lumia sarasadema among. Iba ajanga Phek jila nung Chakhesang nunger den sendakteptsü Tsüngremi jembi"

ta parnokisa ashi.

Iba sülen Naga Shisha Hoho-i Phek Town Baptist Church nung anogo asemnü sarasadem sentong ka ayonga agi aser iba nung Chakhesang lennirtem aser teshimtet nübotem aden.

September 9 nü sentong tagidak nung Ketsapo nunger Vechulu (Chakhesang) aser Surumi nunger Kaholi N Jakhalu (Sumi) nati Shisha Hoho züngsemtem den pulpit nung salemdang tena teka salemba teka mesalatettsüsa kumadok.

Tenati teka salatsü merangaka mesalatet aser tanüla nung asatena senzü. Iba tatalokba ya ngua sentong lenniri tetsür ana atema sarasademsü ayongzük aser teloki sarasadema sülen ang tena teka salatet. Iba tatalokba ajanga Chakhesang aser Sümi nunger nükjiding tuluba atema ka kuma longjemtsü tamaittsü agütsü, ta JLC-isa metetdaksü.

Iba sülen October 1995 nung Chakhesang Public Organisation aser Sümi Hoho tsüngda mezüngbuba senden amen aser idang nungjagi kin ana tsüngda brotherhood senden mena arur.

Tanü sentong nung Chakhesang aser Sümi nungeri onük 6 atema bangzüng ka renemogo.

Bangzüngtem rongnung Sedzu/

Yeti-Zunheboto 2-lane road dang 'Chakhesang-Sümi Brotherhood Road' ta ajatsü dena lir.

Parnokisa Chakhesang Gazetted Officers' Association (CGOA) aser Sümi Officers' Union Nagaland (SOUN) tsüngda senden mapang tapet nung ayonga amentsü lemtet.

Kin anatisa kum asem nung khen 'brotherhood meet' alitsü bangjemtepogo.

Chakhesang-Sümi Brotherhood Meet ya küm 29 tashi liyonga arur anungji tanga kintem den tesentaktep yanglutsü aser kasa tangatetba alirtem den külem taginübatem atema inyaktsü telemtetba agiogo.

May 9, 1998 nü M. Tsügho Village nung CPO aser Sümi Hoho-i kin ana tsüngda 'inter-tribal and inter-village disputes' ajak angatetteptsü bangjemtepba ama inyaktsü

Iba sentong nung Sümi Officers' Union Nagaland president Y. Kikheto Sema, Chakhesang Gazetted Officers Association president Vekhosa Kotoso, Minister G Kaito Aye, MLA Kuzholuzo Nienu, Sümi Kükami Hoho Akükau Advisor Kashito Yephthomi aser taoba NLA speaker Z. Lohe nungeri o tatsütsü jembi.

NSF, LOA & ASU-i Prof. Yeniseti aitsür



Prof. Sarat Chandra Yeniseti

Dimapur, November 26, 2024 (TYO):

Nagaland University nung Prof. Sarat Chandra Yeniseti-i November 25, 2024 nü assistant professor Dr. Lobeno Mozhu dak teka sangshiba aitsür ta Naga Students Federation (NSF), Lotha Officers Association (LOA) aser Angami Students Union (ASU)-i sangdong balala ajanga metetdaksüogo.

NSF-i NU ketdangsürtem dang anogo asemnü tsüngda Prof. Yeniseti mapa nungi anentsütsü takhangba agütsüogo. NSF-i Nagaland University, Meriema campus, Kohima nung Pro Vice-chancellor dangi shidi ka züluba nung iba ya shia lir aser mapang atakzüksüba nung mapa meinyakra nungdakba meratem agia aotsü ta parnokisa shiogo.

November 25 nü Prof. Yeniseti-i postgraduate kaketshir

kar dang o tamajung shia merenshi aser kasa mapang pai tetsür assistant professor ka dak teka sangshi ta NSF-i ashi.

Prof. Yeniseti-i tesüiba nunga tim masüba aser yimya tamajung benshiba osangtem lir ta parnokisa ashi.

Prof. Yeniseti-i tashiyim inyakba, o tamajung jembiba aser kaketshirtem o tesayurtem hao ta mali züngshiba ajanga Zoology department nung tetsübu adoka lir ta NSF-isa metetdaksü.

"Prof. Yeniseti-i ozü züngsem tajung assistant professor Mozhu dak teka sangshiba inyakyim aitsür aser jashir" ta Lotha Officers Association (LOA)-i sangdong ka nung ashi.

Prof. Yeniseti-i inyakba mapa ya tesempatsüka aser shisashir kati inyakba ama masü, ta LOA-isa ashi.

Tetsür ka dang taochi mesayuba aser teka sangshiba ya nisung ajaki aitsütsüla. Bangdakpurtemi Prof. Yeniseti dak mapa tapet inyaktsü ayongzük, ta LOA-isa metetdaksüogo.

Ozüng nung lateta ama mesüi Prof. Yeniseti kumzük ayutsü merangra onoki metoktsütsü ta parnokisa tekümdangtsü olen ka shiogo.

Nagaland Angh La Ganesan-i Tuensang District semdang



Nagaland Angh La Ganesan-i, November 26 nü Tuensang District semdangba mapang tangokba noksa nung angur.

Dimapur, Yimpoksüi/ November 26 (TYO): Nagaland Angh La Ganesan-i, November 26 nü Tuensang District semdang Department tekolaktem aser lokti tentet balala den DC Conference Hall, Tuensang nung senden ka menogo.

Angh-i, Land of Culture ta ajaba district-i arutetba atema kanga pelaba lemsatepba den, Tuensang district semdang nüburtem den sensak asemtsü pa tejangraba liasü, ta ashi.

Paisa, Tuensang nung tejakleni aoba aser tasütait nisungtem den ajurutepba atema pelaba lemsatepba liasü.

Angh-i, taoba küm ishika tsüngda district nung education nung terenlok ngua kanga pelaba lemsatep, kong 2001 küm district indang literacy rate 52.15% liasü saka 2011 küm tashi nungbo 73.70% jungogo, ta ashi. Paisa, Centre aser state sorkar nati jenjang tapet agia rongsenketzung nung tebandang aliba ya terenlok maparen tapet benoka bentettsütsü, ta ashi.

Sentepa aliba lokti den o jembiba mapang Angh-isa, aluyimba ya state nung nüburtem timbai inyakba mapalir, ajisüaka subsistence farmers tem timba lir, anungji Agri. aser Allied Department-i PM Kisan Scheme, Soil Health Card Scheme aser Kisan Credit card amala aluyimba dak sendaka aliba scheme tem aluyimertem nem agütsütsüla, ta ashi.

Health Sector indang jembiba mapang Angh-i, district nung health care koda tongtibang iba indang lemsatep aser Department dang Ayushman Bharat, Pradhan Mantri Bima Yojana aser Chief Minister Health Insurance Scheme amala scheme tem benoktsü ajungshia liasü. Paisa, Pradhan Mantri TB Mukh Bharat Abhiyan koda tongtibang iba indanga lemsatep, koba 2025 küm tashi nungbo Tuberculosis samatsütsü nükjidong nung amenokba lir, ta ashi.

Maneni Angh-i Public Health Engineering Department dang, district nung aliba nüburtem ajak

ajangzükdaktsütsü atema Jal Jeevan Mission scheme agütsütsü atema jenjang tapet agitsü ajungshi. Paisa, Banking ya kanga dang nungdakba service ka koba sentoka metoktsütsüla aser temsüa aliba lisopur ajak ket nung Jan Dhan account alitsüla, talisa tetsürtem ket nung alitsüla, ajita asünungdang banking facility ajak agitettsü, ta ashi.

Angh La Ganesan-i Tuensang nung aliba nüburtem dang, temesepba mozü anema nokdaksü ayongzüik, koba lanu putu atema tebilemstü tulu ka kümogo.

Senden nung PHED, DRDA, CMO aser DAO-i pei department inyakyim indang metetdaksü. DC Tuensang, Lithrongla Tongpi Rutsa-i lokti pela agizükba o jembiba aser MLA aser Chairman DPDB Tuensang, Lima Onen Changia o tatsüka jembiba liasü. Iba sülen Angh-i security personnel tem den security co-ordinate senden ka ayongzüka mena liasü.

Küm 8 sülen Mopungchuket nung 'Süngkotenem beat contest' akatsü

Mokokchung, Yimpoksüi / November 26 (TYO): Rock music meimertem atema osang tajung kaji küm 8 shi 'Süngkotenem Beat Contest' mekateti arur, ibaji tanaben asendenshia sangküm January 10, 2025, nü akatsü lemtetogo, ta tayongertemi osang ka ajanga metetdaksüogo. Iba sentong ya 2001 küm tenzük, aser iba ya Nagaland musician-tem pei sempet arangshidak sabang tajung ka liasüba tanaben asendenshia ayonger.

Iba sentong ya 2016 tashi agia liasü, aser Covid-19 wara ajanga khenpika mayongteti

athi. Iba sentong taoba mapang dang nungi tajungba nung shilua arua ayongtsü tayongertem tejangraba tulu lir.

2025 Süngkotenem Beat Contest nung senpet sen ajak senteper ?1.5 lakh alitsü. Takoker nem sen ?80,000 aser atongdakba nem ?50,000 agütsütsü. Iba den ano alakteta sempet alirtem nem juri senpet agütsütsü tayongertem sentong lir.

Iba sentong ya Mopungchuket yimadak akatsü. Iba beat contest ya tetoktepba ka dangbo masü; ibai lanu asensor kentenmenü jangrar

nem pei sempet arangshitsü asoshi sabang lapokja ajungshiba maparen ka lir. Iba sentong nung Nagaland nungi band balalai arua shilem agitsü imlar.

Tejangrartemi item dokantem nungi form agizüktsü akok; (1) Food Crate Arkong Ward, Mokokchung, (2) Biryani Corner, Alongmen Ward, Mokokchung aser (3) Urban Hub Café, Dilong Ward, Mokokchung. Iba dak sentakba nung osang tejangja metetmürtemi iba phone number – 8837051223/8794269121 ajanga tayongertem tongtetsü.

WDLA-i ayongzüka walkathon ka agiogo

Dimapur, Yimpoksüi/ November 26 (TYO): Temesepba mozü achiba, tanur mezüngmeshia mashiyimi amshiba, aser gender-based violence raktoktsü atema Wokha District Legal Service Authority (WDLA)-i ayongzüka November 26 nü Deputy Commissioner Office nungi District Court Wokha tashi walkathon ka agiogo.

Additional Deputy Commissioner of Wokha,

Renbomo Ezung, NCS-i walkathon ya tenzüktsü aser lisopurtem temeden aser tenyaksü dak sendakba nung legal awareness indang jembiba liasü.

Sentong nungsa WDLA District & Session Judge Nino Iralu-i, lokti nung temesepba mozü achiba ajanga tetsükdaktsütem adokba indang lemsatep. Laisa, district nungi lokti tebilemstütem raktoktsü atema lisopur, lokti

tentet balala aser judiciary longjemer inyaktsü koda tongtibang iba indang jembiba liasü.

DPO, Mission Shakti, N Ekonthung Kikon-i, o tatsü ka jembiba mapang nisung shibelenba, cybercrime amala tebilemstü densema lokti nung tang tebilemstü balala adoker aliba indang jembiba liasü. Iba sentong nung department balala nungi stakeholder temi shilem agia liasü.

Inter-ward Christmas cake Race Dec 24 nü agitsü

Dimapur, Yimpoksüi/ November 26 (TYO): ADC & Mokokchung Municipal Council (MMC), CEO Chumlamo Humtsoe-i sangdong ka ajanga MMC-i 51buba Inter-ward Christmas Cake Race ayongba metetdaksüogo.

Iba asemtepba ya December 24 nü anepdang 6:30 ako nung Mokokchung jila main police point nung tenzüktsü.

Iba dak sendakba nung kiyong ajak dang yimjung aser tesunep tanüla dak ajemdaker cake race nung teküboklen agüja aliba tetuyubatem sülen anidaka shilem agitsü ayongzüko.

Iba asemtepba ya Mokokchung Municipality kübok kiyong balala nung alirtem atema dang asütsü.

Team ajak nung tetsür ana aser tebur teku densema asayar 11 alitsüla. Asemtepertem rongnung mezüngbuba aser tanabuba asemteper ya tetsür asütsü.

Ketdangsurtemi agütsüba format dak ajemdaker kiyong

ketdangsurtemi sign sür aliba asayartem tenüng list December 20 nü tashi nungbo technical committee nem agütsütsüla.

Sentong nung shilem agitsüpurtem ajak anepdang 6 ako nungbo police point tonger alitsüla.

Iba asemtepba nung military, uniform personnel tem shilem agitsü memelatsü.

Asemtepertemi lane ajanga ora aser batons mereptokra disqualify sütsütsü. Lot draw asüba sülen chest No agütsütsü.

Asemtepba nung temaba jenjang nung tembangba team asem nem kuli kakat den cake agütsütsü aser asemtepa nung shilem agiba team ajak nem consolation prizes ama cake agütsütsü.

Tetoktepba mapang mangatettep kar danga adokra asaya ayongertem telemtetba agitsü aser aji tatembang asütsü. Ken o jangjatsü atema Councilor MMC, Imkumniba Kichu No.

8660921902 den tongteprateptsü metetdaksüogo.

Kohima nung State-level workshop ka agiogo



Dimapur, Yimpoksüi/ November 26 (TYO): Entrepreneurs' association aser North Eastern Regional Agricultural Marketing Corporation limited na longjemer, Naga tree tomato & sweet cucumber & user Authorisation atema Geographical indications awareness dak sendakba nung state-level workshop ka ayongzüka agiogo.

Iba sentong ya November 26 nü Directorate of Horticulture, Kohima nung agia liasü.

Sentong agiba mapang Additional Director of Agricultural, Sanuzo Nienu-i, pai district balala semdangba mapang tree tomato aser sweet cucumber tsünüba nguogo, ajisüaka item chiyongtsü ya international shishilembadak atema masü saka pei achitsü aser local shishilembadak ayoktsü atema dang tsünür, ta ashi.

Paisa, GI tag züngoksemba ajanga Nagaland nung shishilembadak dang masü saka international shishilembadaka aluyimertemi tsünütetba chiyongtsütem jangjatsü asoshi teyari agütsütsü, ta ashi.

Maneni pai, entrepreneurs association aser North Eastern Regional Agriculture Marketing Corporation limited nati

aluyimertem nem parnoki tsünütetba chiyongtsütem ayoktsü atema teyari agütsütetsü, aser tree tomato aser sweet potato amala chiyongtsütem bendangleni tena yoktsüsa telongjunga tsünütsü tema ajungmesotetsü, ta ashi.

Kasa mapang nung Director of Horticulture, Meyasashi-i, GI ya oset ka, state mesüra yimtsüng ka nung adodaktsüba atema agütsüba geographical indication ka lir. Pai, GI tagging koda tongtibang iba indang onük ana lemastep. GI tag ajanga chiyongtsü ka yimya balaka nung tesem ka nung adokdaksüba certify sütsür aser iba dak ajemdaker GI tag sütsür. Tanabubaji GI tagging ajanga temelaba agütsür alirtemi dang iba product ya amshitetsü.

Paisa, tanga linüktem nungbo züngi ya pickle, salad, mozü aser tanga nungdaktem atema amshir, ta ashi. Meyasashi-i, Naga sweet cucumber aser Naga tree tomato original documentation ya Horticultural Department-i asü, aser iba document ya NERAMAC ajanga benok, ta ashi. Paisa, GI product ajanga aluyimer aser lanur entrepreneurs tem shirnoki chiyongtsütem tsünüa ayok tenzükdir parnok nem maongka tasen ka agütsütsü, ta shisem.

India-i Bangladesh dang Hindu nungertem kümzüka toktsütsü ashi

New Delhi, Yimpoksüi/ November 26 (Agencies): Hindu nungertem tamangba yimsü lenir Chinmoy Krishna Das Prabhu apuba aser pa nem bail magütsüba Ministry of External Affairs (MEA)-i Mongolbarnü aitsüogo aser Bangladesh sorkar dang linük nung Hindu nungertem aser tamangba yimsü dak sendakba nung nübu agi ajema aliba lokti tem kümzüka toktsütsü mepeshia metedaktsüogo.

Prabhu, shibai anir Bangladesh nung Hindu nungertem anema inyaksangshiba atema aiben longkak aita liasü, pa November 25 nü Dhaka Police indang Detective Branch-i Dhaka airport nung apuba sülen MEA-i iba olen ya lemsatepa liasü.

“Onoki Bangladesh nung ketdangsürtem dang Hindu

nungertem aser nübu agi ajema aliba lokti ajak kümzüka toktsütsü mepeshir, kong parnok yimjung nung adenshitsu aser parnok bilemba lemsateptsü atema parnok temeden densema lir,” ta MEA-i sangdong ka ajanga metedaktsü.

Bangladesh nung extremist temi Hindu nungertem aser tanga teloktem amakba sülen tang Prabhu puogo, ta ministry-i ashi.

Ministry-isa, Prabhu chioktsü khanga yimjung nung longka aita alirtem amakba süoki ia bilemba lemsatepogo.

Prabhu ya International Society for Krishna Consciousness (ISKCON) den küm aika sendaktepa aruogo aser pa iba lokti tentet indang orongdara liasü. Prabhu-i, Bangladesh nung Hindu nungertem anema jenjang agiba

anema ola adoka arudar.

Kasa mapang nung ISKCON temple authorities, shirnoki taoba mapang India sorkar dang ken o dak sendakba nung Bangladesh sorkar den sensak asemstü atema mepeshia liasü, parnoki Prabhu apuba aitsütsü atema India sorkari jenjang agiba atema tenüngsang agüja liasü.

ISKCON Vice President Radharaman Das-i, Chinmoy Prabhu apuba anema nokdakba atema Ministry of External Affairs dang kanga pelaba lemsatep.

Okadak kati Mongolbarnü Prabhu nem bail magütsü aser pa anema benoka aliba sedition ken o ya agizüka liasü. Iba sülen pa chioktsü khanga Dhaka aser Bangladesh kübok tesem balala nung nüburtemi longkak aita liasü.



Maharashtra Angh C.P. Radhakrishnan-i, chief minister ama Shiv Sena lenir Eknath Shinde indang resignation agizükba noksa nung angur. BJP lenir Devendra Fadnavis aser NCP lenir Ajit Pawar nata noksa nung angur. Angh-i, CM tasenba meshim tashi caretaker chief minister ama inyaktsü Shinde dang asüngdangogo.

Sambhal nung tensa tajungba akümer

Sambhal, November 26, 2024 (Agencies): Okadaki Mughal putu mapang yangluba mosque ka survey asütsü tetuyuba agütsüba sülen Sambhal district nung tensa mejungi aküm saka Mongulbarnü school tem aser dokantem lapokogo.

Ajisüaka Sambhal district nung internet services shibangba magien lir.

Hindu aser Muslim nungeri longjemtsü aser loktiliba nung putepa alitsü ayongzükogo. Külen police aser administration ketdangsürtemi tenük yokdar aser tesem kar nung police mapa lemezükja lir. Maneni lendong ataloktsü ana nung aliba tesemtem nung Rapid Action Force teloktem mapa lemezükja lir.

Alemli Mosque alidak Harihar temple ka liasü ta petition ka benokba sülen November 19 nü okadaki survey agidang Sambhal nung mepetmesü adok.

Deobarnü nisung telok ka mosque anasa adenshi aser survey team anema yimyim ayima lungkak ait. Idangji parnoki sepaitem den raratep, garitem nung mi senoktsü aser lung agi aontsü tenzük.

Iba tatalokba nung nisung pezü asü aser aika yirua lir.

“Sambhal nung tensa tajungba kümogo aser dokan teimba lapokogo. Lendong atalokdak dokan kar shibanga lir saka tensabo süngjemogo” ta Divisional Commissioner (Moradabad) Aunjaneya

Kumar Singh-i ashi.

“Lendong atalokba atema police-i kulitem maneni bendendar, FIRs benoka lir aser tarutsü nunga benoktsü akok. Olulu prokshirtem aser mi senoktsürtem merenshitsu” ta pai ashi.

Mongulbarnü Sambhal nung lendong atalokba osang kecha mali ta DIG Muniraj G-i ashi.

“Tensa azükogo, dokantem lapokdar aser khuret kecha mali. Tang tashi nung nisung 25 puogo aser maneni aputsü bushisüngdang südar” ta DIG Muniraj-isa ashi.

“Tangalen alirtemi mepetmesü adoktsü ajungmeso aser kechi atalokogo iba atema sasaa bilemer” ta Peace Committee member aser All India Traders’ Association lennir Haji Ehtesham-i ashi

“Asenok tejakleni aotsüla aser yimjung bener arutsüla. Ni küm aika Peace Committee nung züngsem ka ama inyaka arur aser 2013 nunga mepetmesü angatetteptsü nung yaritepogo. Iba atema initial survey agidang züngsem pungu agi akümba telok ka nung ni dena liasü aser onoki maparen nung amalitepa yaritep” ta Ehtesham-isa ashi.

“Iba survey ya sorkar tetuyuba kübok inyaka, iba nung mangatettep kecha malitsüla. Ajisüaka survey nungeri lokti nung teputep adokdaksütsüla aser külemi inyaktsüla” ta Saraswati Shishu Mandir Principal Shiv Shankar Sharma-i ashi.



Patna nung state Legislative Assembly winter session mapang Bihar Assembly nung LoP aser RJD lenir Tejashwi Yadav-i anir party MP temi longkak aita noksa nung angur.

“AAP voter tem list nungi agintsü tuyu”: Delhi CM

New Delhi, Yimpoksüi/ November 26 (TYO): Delhi nung voter list mashiyimi yangushitsu merangba atema Delhi chief minister Atishi-i Mongolbarnü Centre nung BJP-i aniba sorkar aitsüogo.

Chief minister-i ashiba agi, BJP-i sorkar machinery tem mashiyimi amshia vote tem tim mesüi intoktsü aser talisa AAP den sendaka alirtem dak rangloker inyaka liasü.

X nung post ka ajanga Atishi-i ashiba agi, iba ochimashi inyakyim ya October 28 nü tenzük. Iba anogo SDM-ADMs (Sub-Divisional Magistrates and Additional District Magistrates) 29 transfer yoka liasü.

“Iba sülen mapang tatsüka dang lir ketdangsürtem dang list nungi AAP vote tem agintsü

tetuyuba agüja liasü. Item tetuyubatem ya SDM offices nungi indang indanga arur, kong AERO-BLO (Assistant Electoral Registration Officers aser Booth Level Officers) tem dang list nungi AAP voter tem agintsü tetuyuba agüja liasü,” ta Atishi-i X nung zülutsü.

Atishi-i ashiba agi, Centre-i SDM-ADMs (Sub-Divisional Magistrates aser Additional District Magistrates) 29 transfer yok aser iba sülen ketdangsürtem nem AAP pusemer aser voter tem indang list ka agüja liasü.

Chief minister-isa, AERO-BLO (Assistant Electoral Registration Officers aser Booth Level Officers) tem dang voter’s roll nungi AAP voter tem tenüng agintsü atema tetuyuba agüja liasü, ta ashi.

Atishi-i, AERO-BLO ketdangsürtem dang parnok nongshiba kokteta iba ochimashi inyakyim ya temai adokdaksütsü mepeshia metedaktsüogo.

“Ni AERO-BLO ajak dang ketdangsür kari danga iba ya inyaktsü atema parnok nongshia lira mangaoker kü dangi yoka democracy tepsettsü merangba temai adokdaksütsü mepeshir, ajita asüngdang item ketdangsürtem anema jenjang tapet agitettsü,” ta Atishi-i X nung zülutsü.

Delhi nung election 2025 küm February ita agitsü lia AAP pur tasembuba term election akoktsü atema nükjidong yur inyakba mapang ka lir. Taoba election nung parnoki menden 70 nungi 62 koka liasü.

Tamil Nadu nung tzünglu kanga arur

Chennai, November 26, 2024 (Agencies): Regional Meteorological Centre (RMC)-i November 26 nungi 28 tashi Tamil Nadu aser Puducherry nung tzünglu kanga arutsü ta sangdongba sülen 4th Battalion, NDRF nungi telok 7 yokogo.

Karaikal, Thanjavur, Tiruvarur, Cuddalore, Nagapattinam, aser Mayiladuthurai district tem nung NDRF züngsemtem mapa

lemzüksütsü. Chennai aser temeket nung Mongulbarnepe nungi tzünglu arur. IMD-i November 28 tashi tzünglu kanga arutsü ta asadangtetba osang metedakja lir.

“Tanep nungi mopung tesashiba kümogo aser cyclone kümer Tamil Nadu tzükümlen aontsü” ta RMC, Chennai Director S. Balachandran-i ashi. IMD-i Tamil Nadu atema

‘weather alerts’ sangoktsüogo. November 26 nü central districts 3 nung red alert aser November 27 nü district ana atema red alert sangdonga lir.

November 27 nungi 29 tashi Chennai nung tzünglu kanga arutsü ta ‘yellow alert’ metedaktsüogo. Külen, Kancheepuram, Tiruvallur, aser Chengalpattu district tem nung yellow aser orange alerts sangoktsüogo.



Wayanad Lok Sabha menden bypoll akokba sülen Telangana Chief Minister A Revanth Reddy aser Deputy Chief Minister Mallu Bhatti Vikramarka na Congress lenir Priyanka Gandhi Vadra den senden amemba mapang tangokba noksa nung angur.

NATIONAL COUNCIL OF EDUCATIONAL RESEARCH AND TRAINING
SRIAUROBINDO MARG, NEW DELHI – 110016

DIVISION OF EDUCATION RESEARCH (DER)

NCERT RESEARCH ASSOCIATESHIP (EDUCATIONISTS/RESEARCHERS' POOL) SCHEME

School education aser iba den sendaktepba mapatem nung NCERT Research Associates (khen atema dang) shimtsü asoshi application meshir. Iba mapa atema temsüa ali mali NCERT website www.ncert.nic.in nung repringangma. Application ajak renemer portal ajanga agütsütettsü.

CBC-21104/12/0009/2425



TIR YIMYIM YIMOBILEM (EDITORIAL)

DIMAPUR RASEMNÜ, NOVEMBER (YIMPOKSÜI) 27, 2024

Municipal puribo mayoktsüla

Tiyazü osangang asütsüa akok saka Dimapur nung Municipal Council purtemi dokan shia Christmas petinu sen noklang asemsem agi ayoker ta asüba osangji shitak asünungbo, DMC-i peisasa pei akhüm alutsü mapa inyakba ka asütsü. Iba ama mapa yabo yimti nung yimten temelaba magii kaketshir mesüra lanur telok kati inyakba mapa ka dang mesük. Municipal aser Town Council yabo nübortem dang benjong petinu mesüra küm tasen calendar mesüra lottery ama ayoktsü tentetba yimten ka masü saka itemji shinga nema tashiyim agi meyokdaksütsü asoshi nokdangtsü aser yimti nung shishirtemi nübortem dang osettsüset aser chiyongtsü nung jenjang tali tur memeshitsü asoshi azüokba yimten ka lir. Anungji, parnokiang dokan kibur shia dang tashiyim agi kangtepa, kechisüdirsüaka, benjong petinu yabosa alitsüla ta sentak ataker yoka jajara, ibajibo mashikoshi mapa ka asütsü. Aji oda, Municipal aser Town Council mapaji yimti nung osettsüset aser chiyongtsü jenjang latettsübaji dang masü saka osettsüset aser chiyongtsüji tajung aser shitak asütsüsa anogo shia mita inyaktsü asoshi khuret tulu lir. Talisa tang yabo Nagaland nung mapang talangka Municipal aser Town Council metenzükleti arur, tang tenzükli mezüngbuba Christmas mapang ajurur, anungji yimtittem nung yimten ali metetmeteta Christmas tesünep aser tepela nung yimti ajaklen benjong sübotsü agi prangshia topur jungjunga sübor longsutepa amongtsübaji Municipal purtemia bilema alitsü. Ajisüaka, dokan purtem dang benjong sübotsü ka kangshia alidaktsür amongba benjongjibo, ashiko, aika atema tepela benjongbo masütsüa akok. Atangji, yimti nung municipal aser town council mapaji osettsüset aser chiyongtsü jenjang latettsütsü aser benjong sübotsü enoktsübaji dangbo masü saka benjong mapang dang masü saka küm piyong teti yimti topur junga ayutsübaji parnok mapa lir. Aji oda, yimti yimdong merüka ayutsü, nübortem nem tzü aser light shitak agütsütsü aser kiojen yangluba mapatem nunga yimti nung alirtem lendong masütsüsa tasazük shitak agütsür yangludaksütsüba mapatemji municipal council mapatem asütsü. Atangji, asenokbo municipal ta süaka yimti tila, anungji nütsünga ishika aser senotsü amshia shishilembaba mapatem nunga tajangzük tulu ngua shishir aikabo mali, anungji shishilembartem dang nungi saru aser alimelen agiba kija agibo terenlok mapatem meinyaktettsü. Iba jagi akok tashi Municipal purtema peisasa senotsü bushitsüsa adoker. Item rongnung gari anena ayuba taa, yimti merüka ayutsü atema saru saruba aser shishilembaba mapatem inyaktsü asoshi temelaba agütsüba taa-tem alitsü. Atangji, yimti merüka topur junga ayutsübaji municipal pur mapa kija masü, yimti nung alirtemi peisasa rajema inyaktsüba mapa aika lir. Aji oda, akok tashi kibong shiai pei ki ajangba kilentzü aser kima merüka ayutsüla aser talisa town tiyong nung dokan purtemi pei ki jara nung sentsü shitak topur junga atepba den aonunga light tesangwa agi peria tsükloka yutsütsüla. Joko, yimti nung Municipal aser Town Council arurji street light yindong tashi topur jungjunga yanglur azüngtsüla aser akhidang town tiyong nung jana-ona tokdena yutsüdak tesem ajak naro tsüki akümtsüla. Aji oda, joko yimti yimdonga anepdang shia kiektsü agidang masü saka tzü agi shidoktsüla aser gari lenmang kenyongi raksaa moudaktsüi teti shitak alitsüsa anepalutsüla. Ashiko, Dimapur nung malirtemibo Nagaland sen ajak agi Dimapur dang yanglur ama bilema alitsüa akok, saka arua reprangdangra Dimapur nungbo Nagaland government-a mali ama reprangtettsü. Iba ama mapang ka nung Municipal arubaji kibur arur amai, anungji kiburi kibur ama pei yimti aser nübortem meima anepalutsü imlar.

OLEMSABANG

NLTP ACT: KECHI NUNG TAMAKOK?

~ Rev. Dr. N. Lipok Jamir, Pastor,
Ao Baptist Church, Diphupar

(Yashi adok nungi...)

Anungji, 1967 küm NBCC Women Dept. ajanga Nagaland Baptist Women Union (NBWU) yi tongpang tesashiba raratsü asoshi tentet. Yongji 1969 NBCC ajanga *the Nagaland Central Committee on Liquor Prohibition* Feb. 3, 1971 nü tentet aser Government dang license ajak katitsütsü aser yi shishilembadak ajak küm 3 tsüngda nung shibangtsü aser 1973 küm nungi yi ajak nokdangtsü mepishi. Government-i haihaura asü saka tesüngmangtsüka parnok nungzükbatu meyiper 1974 Nagaland Excise Rule benok aser Naga lima nung yi ayoktsü jenjang agütsü.

Iba sülen ano November 28, 1984 nunga NBCC-i mepishiba nung asen lenir Dr. S. C. Jamir CM aliba mapang Cabinet nung mapang agia lemsateper tang agüja aliba yi ayoktsü temelaba-ji 31/3/1985 tashi melatsü, iba sülen temelabaji renew asütsü memelatsü aser yi ayokbaji anendaktsütsü ta zülu nung agütsü, saka Government-i tenangzükba ama meinyak.

Anungji süaka mesüra taküm liaka ta sür lokti nungzü sentong (*mass movement*) tenzük. October 25-27, 1988 küm NBCC Pfutsero telemtetba nung ajemdaker Lokti Senden tulu jazüka yi anema sentong tulu agi aser Arogo nung lenirtem 5000-i kuli mesür takangba zülu (*memorandum*) ka Nagaland Angh (*Governor*) nem agütsü. Iba mapang ya Angh-i yimsü asüba mapang liasü. Angh-i lokti teyongyaba aser taginüba nung haihaura aka aser takangba agütsütsü ta nangzük.

Aji oda lia aodang October 1, 1988 anogo nung Mon District nung yi khenyongi mamshitsü sangdong. Iba sülen Mokokchung nung January 3, 1989 anogo nungi yi anema tesazük mekai lumitsü (*indefinite Hunger strike*) tenzük. Aji oda January 4, 1989 nü Deputy Commissioner V.N. Gaur-i Mokokchung District nung yi khenyongi mamshitsü sangdong agütsü.

Iba sülen yi tongpang asoshi tesashitiba rara 1989 küm Kohima yimtiba nung tenzük. NBCC ajangasa March 15, 1989 tashi yi khenyongi mamshitsü sangdong agüjang tatahangba State Government nem agütsü; telangzüba tajung magütsüra tesazük maka lumi March 17 nungi tenzüktsü ta ashi. Saka government-i telangzüba kecha magütsü nung March 17-20, 1989 Khrista sepai 5000 adenshia lumia, yi anema sentong agi. Saka Government-i anogo 60 meshizük. Anogo 60ji abensar ano anogo 40 meshilok. Saka Government-i tasa tamajung asar ta metet nung Lumi sentong maneni aotsü Arogo nung lenirtem jatep.

June 21, 1989 nung teshimtet nübu 1000 Kohima Ao Baptist Arogo nung sarasademtsü senden. Tasüng June 22 Arogo lenirtem parnok 7 Assembly Hall-i Bill-ji agizüktsü ai. Saka Bombay Prohibition Law 1949 Nagaland nunga benoktsü terenemba liasü. Iba Ozüng nung Government nungi license ngurbo mashi kati yi yanglutsü, belentsü aser ayoktsü temeten agüja lir. Ibai Government-i nübur mezüngmeshiba, tiyazü jembiba aser tashioktsüba tulutiba ka liasü.

Anungji, medical tsütsü nungi temang tendanger junga alirtem Tsüngrem lar 125 taküm bendanga agüja Assembly Hall, Phoolbari tejakdang June 23, 1989 anepdang 6 ako nungi tesazük maka lumi sentong tenzük. Atangji, Nagaland ajonga nungi tanela nung tadinemditem (*spiritual giant*) 125 rongnungji karbo kupu pur, aser karbo lemstütem liasü. Itemji angudang temulung shirangtsüka, temenungratsüka liasü ta ashir. Naga lima ajonga nungi atenshia, arogo nung lenirtem 1000 temai nungita sentongji tenzük. Item tenzükter 125 nungji asen Aor 45 liasü.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Küm 1,500 tejakdang yangluba Christian basilica ka angu



Rome, November 26, 2024 (Agencies): Austrian Archaeological Institute of the Austrian Academy of Sciences (ÖAW) researchers-i Aquileia, Italy nung Christian Basilica tejen ka ngutetogo.

Iba tenla ki ya Byzantine style nung lir aser Aquileia nung tamangba yimsü

renlokba sayur. Iba yimti ya Emperor Justinian I-i zigzag wall ka ajanga longbanga liasü ta mogintemi ashir.

Aquileia ya 181 BC nung Roman military colony ka ama amenok. Iba ya tanü Austria linük kübok lir aser Grado on the Gulf of Trieste nungi kilometer 10 shi pilar amenok.

1998 küm iba yimti ya UNESCO-i World Heritage Site ta sangdongogo.

Küm 1500 tejaklen Aquileia ya Italy nung tongtipang yimitem rongnung ka liasü ta Ancient Origins report notes ajanga ashir.

181 BC nung iba yimti ya military encampment ka ama tzüküm anasa amenok.

India nung Khristantem tali reshikangshir

New Delhi, November 26, 2024 (Agencies): India kübok state 28 nungi 23 nung anogoshia Khristantemi timtem ajurur ta New Delhi nung amenoka aliba civil society organization United Christian Forum (UCF)-i ashir.

UCF ajanga adokba "Violence Monitor Report 2024" nung January nungi October tashi tatalokba balala indang shia lir.

Taküm October ita tetsürtem dak tashiyim inyakba tatalokba 12 liasü, Dalit Christians dak tatalokba 14 aser lipur Christians anema 24 atalok. Iba ajanga India nung Khristan tamangertemi timtem aser reshikangshi ajuruba sayur.

Taküm October ita tashi UCF helpline nung tatalokba 673 tashi sangoktsüogo. Tatalokbatem rongnung North Indian states ana- Uttar Pradesh (182) aser Chhattisgarh (139) nung teimtiba atalok.

Tatalokba 673 rongnungi 47 dang First Information Reports (FIRs) benoka liasü. India police-i FIR mebenok tashi mapa meinyaker.

India nung Khristantemi tamangba yimsü mebenshiteter kechiyong anogoshia Khristantem reshikangshiba ataloker ta UCF National Coordinator A.C. Michael-iashi.

India nung Hindu nationalist Bharatiya Janata Party (BJP) sorkar makümdang India nung Khristantem dak tashiyim

inyakba tatalokba 100 teküpok liasü.

2018 nung Khristantem anema tatalokba 300 shi liasü aser iba sülen kümshia teimba ataloker.

"2023 nung onok dangi tatalokba 750 tashi aruogo aser iba tetezü anogoshia Khristan ana dak tashiyim inyakba lir" ta Michael-i ashi.

"India nung Khristantem dak tashiyim mapa inyakba atema süoki ia bilemer. Hindu teloktemi Khristan tamangertem amaker. Mapang kar nung pastor temi tashiyim agi tamangba yimsü meyipdaksür ta tai tonglokja apur saka iba atema ozüng mapa kecha meinyaker" ta Michael-isa ashi.

ANOGO ABEN TSÜNGREM DEN

Aonung Sensaksem

T. Ken 77:1-6

Mapang kar amangji asenok dak alir. Tasü mait arudaktsür, aser asenok Asaph ama akümer, shibai ashi, "Kü timtemba anogo nung ni Kibuba bushir; aonungji kwika maneni songlaa liasü; kü nelai ani mesüngzükünü" (t.2). Ne nelai animesüngzükünü dang nai kechi inyaktsü ?


Asenoki kechi inyaktsüla Asaphi ashir. Mezüngbuba, "Kü nulai, oda Tsüngrem dang kü ola agi ni Tsüngrem dang ayimtener, aser Pai kü dang angashi" (t.1). Kari ashir, kodang na aonung memejangtetlir, san azüngdang nungi, Sannüker den jembidang. Asaphi yamaji inyak. Mapang mapang nung Kibuba dangi aotsü timtem adoker. "Ni Tsüngrem bilemtetter, aser shisa bulur" (t.3). Pa timatemsüsa pai Tsüngrem indang kechi bilemtet? Tebilem nung ozüng ka nung tashi mangai alitsü mesüra tenangzükba ka nung arendaka alitsü. Mesüra pai Tsüngrem koda temeshi aser pa koda temenen bilemtetter alitsü.

Saka Kibuba den jembiba jagi tejangja angatetdaksür. "Ni alemli mapang, aki tendak, indang bilemdangogo" (t.5). Tanga o ka nung, Tsüngrem dak amangtsü akok. Ali mapang pai na anebalua liasü, aser na tarutsü indang pai anebalutsü.

Tanabuba, ne sasa den jembidang. "Ammang nung ni ken ken bilemtetter; ni kü mulungjang den jembir; aser kü nelai kümdanga bushir" (t.6). Kibuba indang ne sasa den jembidang. Ne taküm aser ne Khristan taküm jajaba tendangang. Ne tasü mait ken agi melentsütsü. "Ammang nung ni kü ken bilemtetter" (t.6).

Kodang na tasü meiti kümdar, ne nük meketa aliba tia nung meyiper Kibuba dak ranglokang. Ne taküma tendangang. Nai Kibuba dang tashi mangai lir asü ? Pa den jembidang aser Pai na tasü itdakjang. Idangji ne sasa den jembidang aser ne sasa Tsüngrem mapa nung tasü itang. Pai ne nem amang nung ken ka agütsütsü.

Netherlands nung Christians for Israel Center amak



Amsterdam, November 26, 2024 (Agencies): Israel anemertemi Netherlands nung Israel pusemba Khristan telok ka indang office tem amak.

Palestine pusemba activists-i Jewish Israeli soccer fans amakba sülen hopta ishika lir lungkak aitertermi Christians for Israel Center office amak.

Nijkerk nung Christians for Israel office lir aser lungkak aitertermi Christians for Israel züngsemtem anema spray-paint asü.

Meimchir samatsürtem, tanur tepsetertem aser Gaza nung inyakba pusemertem Nijkerk nung lungkak aitertermi Christians for Israel

züngsemtem aitsü.

Climate justice organization Extinction Rebellion-i iba lungkak aitba atema tenüng agiba sangdongogo.

Iba sentong nung Christian Collective aser Justice Now züngsemtemi shilem agi ta parnoki ashi.

"Asen linük nung iba amai

atalokba atema kanga aoksar" ta Christians for Israel Netherlands executive director Frank van Oordt-i ashi.

Israeli soccer fans aser tourists amakba sülen Christians for Israel-i Amsterdam nung rally tulu ka agitsü sentong atonga lia iba ya atalokgo.

Tan ita tetenzüklen Israeli team Maccabi Tel Aviv-i Ajax soccer club den asayadang nisung telok kati Yihuda nunger amak.

Iba tatalokba sülen Amsterdam nung anti-Israel lungkak aitertermi Yihuda nunger dak tashiyim inyaka arur.

AO OSHI ANGAZÜKDAK:

TANÜ ANGAZÜKTSÜBA OJANG

Tashitak

(n) temang shirangdaksüba (disease)

* Tashitak karbo mozü agi majunger.

Tashitemeteter

(n) shia metetba nisung, talangka azüngba nisung (knowledgeable person)

* Tashitemeteter alidak nübertem tangatetba angur.



Tir Yimyim

OLONG PAITEP # 6994

Grid for OLONG PAITEP # 6994 with numbers 1-24 in various cells.

TIPLIN

- 1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nüsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasatsüingda jatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6993 TELANGZÜBA

TIPLIN :

- 2. Pongsen, 5. Lepko, 7. Omen,
8. Maangka, 10. Yangkhu,
12, Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Pio,
9. Nüingdak, 10. Yongya,
11. Kongro, 13. Ora, 14. Ata.

NAI-A YA METETTER MA



Parivu Dr. S Sakthi Vel-i 5 buba World Record ngutetogo aser iba ya Grand Universe Book of Records ajanga agizükba lir. Constituency 234 nungi tsüingsangertem adenshia sabang ka nung shilem agidaksüba atema pai iba otsü tasen yanglutet. Iba sentong ya My Screen Medis (MSMNC) ajanga ayongzük

Guwahati nung nisung 2 ket nung Rs 3 crore alang heroin apu



Guwahati, November 26, 2024 (Agencies): Guwahati kübok Tetelia area nung nisung ana ket nung Rs 3 crore alang heroin bena aliba puogo. NH-37 nung Rishi Marbles anasa Mongulbarnü special Naka

operation ka agidang tena apu. Tena ket nung heroin grams 364 bena aliba apu. Truck gari (Registration: AS-18AC-6959) soter mita repringdang tena apu. Police-i truck gari mita

repringdang sapon pongdang 32 nung heroin bena aliba angu. Nisung ana ya driver Mofizul Ali (26) aser handyman Surat Jamal (30) na lir. Ali ya Kokrajhar kübok Jiyaguri aser Jamal ya Dhubri nung alir.

Mizoram MP-i Manipur nung President's rule benoktsü akhanger

Aizawl, November 26, 2024 (Agencies): Mizoram Rajya Sabha MP K. Vanlalvena-i Manipur nung President's rule benoktsü nenshia metetdaksüogo.

tebilemtsü aser idakji lisopurtemi timtem ajuruba atema jembia arur. British nung marudang Manipur nung Mizo nung aika liasü aser tanga parnok lakh 6 tema lir" ta Vanlalvena-i ashi.

jembia aruogo. Paisa kin o kin rara anentsü atema President's rule benoktsü takhangba agüja arur.

Kin o kin ana tsüingda rara anendaktsütsü atema President's rule benoktsüla ta pai ashi. Deobarnü Union Minister of Parliamentary Affairs Kiren Rijju-i New Delhi nung all-party senden ayonga amendang Vanlalvena-i Manipur nung President's rule benoktsü onük benoka jembi. "Ni Mizoram nungi MP ka süaka mapang shia Manipur

Aizawl nung refugee nung aser Myanmar, Bangladesh o Manipur nung jena aruba tanurtem yaritsü atema United Nations International Children's Emergency Fund (UNICEF) indang branch office ka lapoktsüla ta paisa metetdaksü. Tesüiba nung MP Vanlalvena-i Manipur nung Meitei aser Kuki-Zo nung asoshi 'separate administrative units' tenzüktsü


"President's rule benokba ajanga dang telatetba ka agitetsü. Iba mapang Centre-i tensa asadangtsü aser Meitei o lisopurtem ali repringshimsü" ta pai ashi. "Manipur nung hill tribes pur valley-i mouteter aser Meitei nung hill areas-i mouteter. Meitei aser Kuki-Zo nung atema administrative units balala tenzüktsüla aser iba ajanga teti atema rara anentsü" ta Vanlalvena-isa shisem.

Itanagar nung ANSU election votes azüingdang rara adok

Itanagar, November 26, 2024 (Agencies): Arunachal Pradesh nung All Nyishi Students' Union (ANSU) elections indang votes azüingdang rara adokba atema Itanagar police-i nisung 10 apu. "November 25 aonung 9:00 ako meta Siddhartha Hall nung votes azüingdang candidate ana pusemertem tsüingda rara adok" ta Superintendent of Police (Capital), Rohit Rajbir Singh-i ashi. Iba mapang hadir aser süng amshia raratep aser idangji

nisung pungu yiru. Ano telok ana tsüingda injang yoktepba ajanga tensa tamajungba aküm, ta SP Singh-i ashi. Tensa azüoktsü atema police-i tenük amdaktsüba mokozü, stun grenades amshiba sülen lathi-charged asü. Police-i telokji azüoktet saka tenemlen nungi injang khatokba manen aser police aika yiru, ta SP Singh-i metetdaksü. Iba tatalokba sülen hospital balala nung telok ana tsüingda rara adok. Iba dak sendakba

nung Itanagar police station nung FIR ka benokogo. All Nyishi Students' Union (ANSU) ya 1982 nung tenzükba lir aser Northeast nung kaketshir telok tejentem rongnung ka lir. ANSU ya Nyishi nung tongti kaketshir telok lir aser parnoki Papum Pare, East Kameng, Kra Daadi, Kurung Kumey, Pakke Kessang, Keyi Panyor, Kamle aser Upper Subansiri districts tem nung inyaksangshir.



Kangpokpi district kübok Makhan yimtsüing nung Kangpokpi Police, CRPF, aser district administration-i poppy alu raksatsüba noksa nung angur. Mongulbarnü parnoki ali acre 12 nung poppy alu raksatsü aser iba atema Manipur Chief Minister N. Biren Singh-i tenüingsang agütsüogo. "Kuki telungpurtemi noktangka tanü teloki ali acre 12 nung poppy alu raksatsüogo. State aser Centre sorkartemi poppy lu ayimertem dak tenük yokdar aser onoki poppy süngdong tatembangba dena atsüdoktsü" ta CM N Biren Singh-i ashi.

Office of the
Molungkimong Baptist Church
(ESTD.22nd Dec.1872) P.O.Tuli.798618, Nagaland

Dated: Molungkimong, the 27th November 2024

TENÜNGSANG AGÜTSÜR



Molungkimong Baptist Arogo ajanga Molungkimong jala **Dr. C. Pursenla Ozukum**, D/o. Mr. Chubanungsang Ozukum & Mrs.Repalila Tzudir, lai **Doctor of Theology (D.Th) in Religion** ngutetba atema la nüm tenüngsang tetushi agütsür. La indang thesis onük ji, "The Islamic Ethical concept of Taqwā and its Role for Interfaith Relations" aser iba longtet thesis nung Senate of Serampore College, Kolkata ajanga 22nd November 2024 anogo Convocation aliba mapang la nem iba nungja agütsür.

La dang Eastern Theological College, Jorhat, Department of Religion nung Associate Professor teinyakdak lir.

Tsüngremi nü mapa aser wadang nüpurtem asoshi maneni azükarudakjangma. Ibai asen Arogopur sarasadem. Amen.

(M. Temsu Nokdir)
Asso. Pastor Cum Secretary

(R. Moaliba)
Pastor

**KIBONG KÜMER KÜM 50 ABENSABA
TEPELA SALEM**

Mr. Talilepzüng aser Mrs. Sendongjungla
27th November



Kibong kümer küm 50 tashi Tsüngremi len ania aruba angudang Tsüngrem tenüng asanger. Nüna akhum aser Sarasadem tashi nung onok temoatsü, teküzmükba nung lia arudaki aser aika asoshi tsürabur, adianu aser tembar tajung ama liteta aruba ngua kanga pelar. Tsüngremi nüna nem ano arishi talang, taküm tajung maneni moajangma ta aji özü Sarasadem.

~ Teti meima aliba, Chirnur aser Semchirtem.

PM Khan pusemertem aser security tsüngda mangatetep adok



Islamabad, Yimpoksüi/ November 26 (Agencies): Taoba Pakistan Ato Kilonser Imran Khan pusemertem linük yimtiba Islamabad-i tashiyim amshia aitsü merangba mapang Pakistan security forces züngsemtem taküm samaba osang metetdaksüogo.

Security service personnel pezü taküm samaogo, ta sorkari Mongolbarnü metetdaksü. Police-i tenokdangba agütsür aliba mangai yimti-i aitsü merangba mapang iba lendong ataloka liasü.

Kiralongraba dak sendakba nung okadak ken o mangadang tsüngda taoba Pakistan PM Khan'er party Pakistan Tehreek-e-Insaf (PTI) party-i pa chioksü khanga longkak aita arudar.

Ato Kilonser Shehbaz Sharif indang office sangdong ka ajanga ashiba agi, gari ka agi atsükba sülen security pezü

tepsetogo. Sorkari injang amshitsü amokmerenba mangai longkak aitertem security forces den raratepba mapang Sharif-i iba azütokshi lendong atalokdaksüba atema aija ashiba agi, "iba ya yimjung nung longkak aitba ka masü. Iba ya tali tabong inyakba lir."

Longkak aitertem Islamabad tonga aruba mapang anogo ana tashi mangatetep adokba sülen Deobarnü nisung taküm dena samaogo. Yimti ketdangsürtemi taoba hopta yimti nung ita ana lokti senden kecha ayongzüka magitsü tenokdangba agütsüogo.

Osang ajangsa ano gari tsüktepba mapang civilian-a ka asüba indang metdatksüogo.

Osang agütsüba mapang tashi nung longkak aitertem karbo Islamabad indang Red Zone D-Chowk tonga oer aliba metetdaksüogo. Kasa mapang nung security forces temi longka aitertem dak injang aser

tear gas khalokja liasü.

Interior Minister Mohsin Naqvi-i ashiba agi, constitution kübok Article 245 benokba sülen Red Zone-i army yokogo.

Khan shiba 2022 küm no-confidence vote ka sülen mapa nungi anenja liasü, pa küm ka dak tema tepuokdak yua lir aser pa anema ken o 150 dak tema benoka lir.

Police-i Hokolbar nü nungi tenzüka Khan pusemer 4000 dak tema puogo aser linük kübok tesem kar nungbo mobile aser internet services shibangtsüogo. Educational institution tema ajak shibanga lir.

Islamabad aser tanga yimtitem tsüngda senzusenpongtsü kanga tasak kümogo, kechiyong ketdangsürtemi shipping container tem amshia lenmangtem nokdang lir. Ajisüaka longkak aitertem Mongolbarnü item tenokdangbatem ya nongshia Islamabad tongtetogo.

Trump-i Mexico, Canada & China nem tariff talila agütsütsü nangzük

Washington, Yimpoksüi/ November 26 (Agencies): Donald Trump-i ashiba agi, pai tir mapa agizükba sülen mezüngbuba anogo China, Mexico aser Canada nem tariffs tasen agütsütsü ta shiogo. Ozüng alema nüburttem US-i aruba aser temesepba mozü shibelener aruba nokdangdaksütsü atema ibe jenjang agitsü, ta pai ashi.

US president-elect-i ashiba agi, pai 2025 küm January 20 nü tir mapa agizükba sülen Mexico aser Canada nungi aruba oset ajak atema tariff 25% benoktsü atema executive order ka nung sign asütsü.

Paisa, China sorkari par linük nungi US-i fentanyl shibelener aruba menokdang tashi tariff 10% talila bendenloktsütsü, ta ashi.

Trump-i ashiba ama jenjang agira, iba ajanga US aser parnok den shishilembar tongtiba asem den mangatetep taliba akümtsü. Iba ajanga America nungertema osetem jenjang timba agi alitsüsa

akümtsü akok, kechiyong tariff ya tangalen nungi oset bener aruba saru ka ama sarur.

US ya alima nung bendanglen nungi oset belener aruba linük tulutiba lir. Parnoki kümshia USD trillion 3.2 alang osettsüt balala belener aruba nung shilem 40 bo China, Mexico aser Canada nungi lir.

China-i, parnoki temesepba mozü shibelenba nokdangtsü atema merangdangba indang metetdaksüogo aser linük ana tsüngda shishilembaba tsütsü raratepba ajanga shinga majangzüktsü ta shiogo.

Trump-i tariff ajungkettsütsü amokmerenba sülen pa aser Canada Ato Kilonser Justin Trudeau na shishilembaba aser arrtsü nung security dak sendakba nung sensaksem ka kaogo, ta Canada nunger source kati Reuters news agency dang ashi. Tena kanga junga sensaksemogo, ta iba source yagi ashi.

Kasa mapang nung Mexico indang finance ministry-i

ashiba agi, "Mexico ya United States' atema shishilembartem rongnung tongtiba lir aser USMCA ajanga national aser international investor tem nem framework ka agütsür."

Iba jenjang agiba ajanga global supply chain nung minprong atokdaksü akok aser tariff benokba linük asem dak kanga mejungi kongshitsü.

Mexico aser Canada anema benokba tariff ya linük ana yagi temesepba mozü aser talisa fentanyl shibelenba aser ozüng alema migrant tem arrtsü adena US-i aita menokdang tashi benoka atatsü, ta Trump-i pa indang Truth Social platform ajanga metetdaksü.

"Mexico aser Canada naprongla dak iba tebilemtsü ya mela mela bentetsü atema temeden aser tashi lir," ta pai zülutsü. "Parnoki tang taah tulu ka agütsütsü mapang tongogo," ta Trump-i ashi.

Truth Social post nungsa Trump-i, Beijing-a aitsüogo aser ashiba agi, fentanyl shibelenertem pura tasüba agi

merenshitsü ta China nunger ketdangsürtemi tenangzükba agütsüba ama minyaker.

Washington nung Chinese embassy otongdar kati BBC dang ashiba agi, "China-i metetsümonga United States-i fentanyl shibelener yoker ta bilemba ya ochiba den khenyongi meputep."

"China-i, China aser US na tsüngda rongsenketzung aser shishilembaba nung tesendaktep ajanga linük anaprongla ajangzükker ta amanger. Shingaia shishilembaba tsütsü mesüra tariff rara makoktsü," ta pai shisem.

Biden indang administration-i, fentanyl yangluba nung amshiba ingredient tem yangluba anendaksütsü atema jenjang talila agitsü asoshi Beijing ayongzüka arudar. Washington-i ashiba agi, iba ajanga taoba küm America nunger 75,000 tepsetogo.

Election atema nüboyimba mapang Trump-i, nungdak dang

süra tariff shilem 100 tashi benoktsü ta shia Mexico aser China na amokmerenogo, koba pai taoba mapang tir mapa bener aliba mapang benokba dang nungi kanga agi timba asütsü.

Taoba küm Mexico indang exports shilem 80 dak tema US-i ao aser Canada indang exports 75% shi US-i oa liasü.

Alima nung economy tulutiba ana küm aika mangatetep adoka aruaka China indang export shilem 15 tang tashi US dangi yoker.

Tariff ya bendanglen nungi osettem bener aruba mapang agiba domestic saru ka lir. Anungji gari ka USD 50,000 alang US-i bener arura iba atema tariff shilem 25 agitsü aser aji USD 12,500 asütsü.

US rongsenketzung yanglushitsü atema Trump nükjidong nung tariffs ya teyongtsü lir aser pai iba ya US rongsenketzung ajungkettsü, mapa kümzüka ayutsü aser tax revenue ajungkettsü atema lenmang ka ama bilemer.

Banda nem BBC Women's Footballer of the Year naroküm agütsü



Yimpoksüi/November 26, 2024 (Agencies): Zambia aser Orlando Pride forward Barbra Banda nem BBC Women's Footballer of the Year naroküm agütsüogo.

Taoba ita iba naroküm atema asayar pongu tenung nominate asüba sülen BBC Sport website azüngertem nungi lai vote timba ngua liasü.

2023 küm September ita nungi 2024 küm August ita tashi asayaba dak ajemdaker asayartem nominate süa liasü. Iba naroküm atem asayar ya coach, asayar, administrator aser non-BBC journalist tem aika densema mongintem palen kati shima liasü.

"Ni iba naroküm anguba ya mamangteter," ta arishi küm 24 taina sayar yagi BBC Sport dang ashi.

"Kü nem vote agütsürtem

aser kü taküm aser career nung shilem agirtem ajak aser talisa ozü kibong, Zambia nung national team aser Pride team dang kanga pelar. Iba ya ajak atema lir," ta laisa shisem.

Barbra Banda ya BBC Women's Footballer of the Year award agizükba asayar 10buba kümogo.

Paris Olympics nung asayaba mapang Banda-i Zambia atema goal pezü idaktsü, kong Australia den hat-trick ka idaktsüba densema lir.

La March itang Pride team nung tenaka lai 2024 National Women's Soccer League (NWSL) regular season nung Pride atema goal 13 idaktsüogo, kong playoffs nung goal pezü idaktsüba aser Honibarnü championship final nung Orlando Pride puri mezüngbuba title abenba mapang goal ka

idaktsüba densema lir.

Kasa mapang nung Banda nem NWSL nung Most Valuable Player (MVP) naroküma agütsüogo.

La sülen tanabuba jenjang nung Spain aser Barcelona midfielder Aitana Bonmati aser USA aser Portland Thorns forward Sophia Smith tasembuba jenjang nung liasü.

Asayar pongu shimba rongnung Norway aser Barcelona winger Caroline Graham Hansen aser USA aser San Diego Wave defender Naomi Girma nata densema liasü.

Banda ya Chinese club Shanghai Shengli nungi USD 740,000 yong Pride nung March ita aden aser la ya külem Zambia tsür Racheal Kundananji sülen tetsür asayartem rognung sen timtiba agi alizükba asayar aküm.

Leicester City-i Manager Steve Cooper mapa nungi anentsüogo

Yimpoksüi/November 26, 2024 (Agencies): Leicester-i Deobarnü manager Steve Cooper mapa nungi anentsüogo. Parnok tang Premier League relegation zone-i point ana agi dang mai lir.

Arishi küm 44 tain Cooper yagi June ita Enzo Maresca melena liasü, ajisüaka pa ya taoba mapang local rivals Nottingham Forest den sendaktepa aliba ajanga fan temi kangabo mesakloki liasü.

Pa lenisüba nung Leicester puri Premier League asaya 12 nungi ana dang akok aser parnok relegation zone-i aitsü ana nung lir.

Honibarnü Chelsea den asaya goal 2-0 agi makokba sülen Cooper ya mapa nungi anenja liasü.

Pa melentsüpur meshim tsüngda first team coach Ben Dawson-i khen atema coach mapa bena atatsü.

Cooper ya mezüng England national team youth set up nung coach mapa inyaka pa indang career tenzük aser iba sülen Swansea nung küm ana inyaka liasü.



Ajisüaka pa Forest nung inyakba mapang nungtugu aküm. Pa lenisüba nung Forest pur küm 23 sülen Premier League nung asayatsü maongka nguteta liasü.

Bournemouth aser Southampton madak takok nguaka fan tem den tensa mejungi aliba tajungba maküm.

Asaya pongu tashi takok manguba den League Cup nunga Manchester United makokba sülen pa tang mapa nungi anentsüogo. Leicester pur tang league table nung jenjang 16buba nung lir.

United-i Erik ten Hag mapa nungi anentsüba sülen Cooper ya Premier League nung tang asaya aliba season nung club-i mapa nungi anentsüba coach tanabuba kümogo.

Satwik-Chirag na Syed Modi International Tournament masayatsü



Yimpoksüi/November 26, 2024 (Agencies): India nung nungtugu tarep asayar Satwiksairaj Rankireddy aser Chirag Shetty na Syed Modi International Super 300 badminton tournament nung masayatsü atema telemtetba agiogo.

Taoba mapang world No 1 tarep ya iba asayamung nung tebur tarep asaya akoktsü imlartem rongnung ka liasü, saka tang shilem magitsü telemtetba agiogo. Tena ya Paris Olympics sülen Satwik tapu yiruba ajanga mapang talangka masayai aruogo.

Tena taoba hopta China Masters Super 750 tournament nung asaya aser semifinal tonga asaya liasü.

Ajisüaka B Sumeeth Reddy, shibai China Masters masayatsü tsüngda tena nem mezüngbuba round atema bye training agütsü aser iba

asayamung nunga tena meiner oa liasü pai ashiba agi, Satwik ano taneptsü kanga junga monguteti lir.

"Satwik yirur talangka masayai lir tangang meyipa aru. Tena mapang talangka lir asayar. Shenzhen nung tena hopta tepeyong kanga belema asayaogo, kong tena semifinals tonga liasü. Khen khenbo taneptsü kanga junga angutsü taksa, anungji taruba season atema tena temang temulungdang yur tenati iba asayamung nung masayatsü telemtetba agiogo," ta Reddy-i PTI dang ashi.

Top seeds tarep ya mezüngbuba asaya Chen Xu Jun aser Guo Ruo Han na den asayatsü liasü, saka tang masayatsü telemtetba agiba sülen China nung tarep nem mezüngbuba round atema bye agütsüogo.

RR-i Arishi küm 13 tain Vaibhav sen crore 1.10 agi alizükogo



Yimpoksüi/November 26, 2024 (Agencies): Indian Premier League (IPL) nung tang arishi küm 13 tain asayar ka iba asayamung nung asayar tanobusang kümogo.

Bihar nungi arishi küm 13 tain Vaibhav Suryavanshi ya Rajasthan Royals (RR) pur sen crore 1.10 agi alizükogo.

Left-handed batter ya Ranji aser Mushtaq Ali trophies amala national asayamung

nung par state tenung nungi asayaogo aser Under-19 internationals nunga India tenung nungi asayadar.

Suryavanshi alizüktsü atema Delhi Capitals aser RR nati sen bid asü aser tatem nung RR-i alizükogo, kong pa taoba mapang training agia liasü.

India nung cricket asayartem ya timba Mumbai, Delhi aser Bengaluru amala

yimtittem nungi dang shima liasü, saka IPL tenzükba sülen yimdak yimtsüng aser jila balala nungi asayartema maongka ngua arudar.

Suryavanshi, shiba India tenung nungi Under-19 Asia Cup asayatsü atema Dubai-i oa lir, pa Ranji nung mezüngbuba arishi küm 12 asüba mapang January ita Bihar team nungi Mumbai den asaya liasü.

Pai tang tashi nung Ranji asaya pongu asayar lir aser pa run 41 timtiba yanglur lir. Ajisüaka hopta ishika tejakdang Australia den Under-19 unofficial Test asayaba mapang pai ball 58 nung century ka yanglua liasü, koba pa indang career nung takok tajungtiba asütsü. Paisa, Bihar nung Under-19 asayamung ka asayaba mapang out mesüi run 332 yanglua liasü.

"Pa sempet tajung aketba asayar ka lir, ajisüaka IPL jenjang nung asayatsü atema peisasa dak temulung lema asayatsüla," ta team CEO Jake Lush McCrum-i auction tembangba sülen ESPN Cricinfo dang ashi.

BILEMDANGANG
"Na taküm lira na asoshi Tsüngrem sentong ano metembangir lir,"